

## AUGLÝSING

### um deiliskipulag á leigulóð í landi Böðmódsstaða II og frístundabyggðar á Austureyjarnesi í landi Austureyjar II í Laugardalshreppi.

Samkvæmt skipulags- og byggingarlögum hefur hreppsnefnd Laugardalshrepps þann 2. maí 2000 samþykkt deiliskipulag leigulóðar í landi Böðmódsstaða II. Einnig samþykkti hreppsnefnd Laugardalshrepps þann 11. janúar 2000 deiliskipulag frístundabyggðar Félags íslenskra símamanna á Austureyjarnesi í landi Austureyjar II í Laugardalshreppi.

Greinargerðir og uppdráttir hafa hlotið þá meðferð sem skipulags- og byggingarlög mæla fyrir um.

Deiliskipulögin öðlast þegar gildi.

*Laugarvatni, 13. júní 2000.*

**Guðmundur Rafnar Valtýsson** oddviti.

29. maí 2000

Nr. 442

## SAMÞYKKT

### um stjórn og fundarsköp Biskupstungnahrepps.

#### I. KAFLI

#### Almenn ákvæði.

##### 1. gr.

Hreppsnefnd Biskupstungnahrepps er skipuð 7 hreppsnefndarmönnum kjörnum samkvæmt lögum um kosningar til sveitarstjórna nr. 5/1998, sbr. 8. og 12. gr. sveitarstjórnarlaga nr. 45/1998.

Starfstímabil hreppsnefndar hefst 15 dögum eftir kjördag í sveitarstjórnarkosningum og gildir til jafnlengdar að fjórum árum liðnum.

##### 2. gr.

Hreppsnefnd fer með stjórn Biskupstungnahrepps samkvæmt ákvæðum sveitarstjórnarlaga og annarra laga. Jafnframt fer hreppsnefnd með yfirstjórn stofnana og fyrirtækja á vegum hreppsins að svo miklu leyti sem hreppsnefnd hefur ekki falið öðrum slíka yfirstjórn.

##### 3. gr.

Hreppsnefnd skal gæta hagsmuna Biskupstungnahrepps, vera í fyrirsvari fyrir hann og vinna að sameiginlegum velferðarmálum íbúa hans.

##### 4. gr.

Hreppsnefnd annast þau verkefni sem henni eru falin í lögum, reglugerðum og samþykktum. Þá getur hreppsnefnd ákveðið að Biskupstungnahreppur taki að sér verkefni sem varðar íbúa hreppsins sérstaklega, enda sé það ekki falið öðrum til úrlausnar að lögum.

##### 5. gr.

Meðal verkefna hreppsnefndar Biskupstungnahrepps er:

1. Að setja samþykktir og gjaldskrár eftir því sem lög mæla fyrir um og þörf krefur.
2. Að stjórna fjármálum hreppsins, stofnana hans og fyrirtækja skv. VI. kafla sveitarstjórnarlaga og VI. kafla samþykktar þessarar.

3. Að kjósa skoðunarmenn til að yfirfara ársreikninga hreppsins og ráða löggiltan endurskoðanda eða endurskoðunarfyrtæki sem vinna skal að endurskoðun hjá hreppnum.
4. Að ákveða stjórnkerfi Biskupstungnahrepps og ráða sveitarstjóra og aðra starfsmenn í helstu stjórnunarstöður.

## II. KAFLI

### Um fundarsköp hreppsnefndar.

#### 6. gr.

##### *Um fundi hreppsnefndar.*

Hreppsnefnd heldur reglulega fundi einu sinni í hverjum mánuði annan þriðjudag hvers mánaðar. Heimilt er þó að færa til fundartíma og dagsetningu fundar og skal það þá auglýst sérstaklega. Skulu fundirnir að jafnaði haldnir í Fjallasal, fundarsal hreppsnefndar í Aratungu. Skulu þeir færðir í aðalsal Aratungu ef þurfa þykir, sbr. 2. mgr. 14. gr. samþykktar þessarar.

Hreppsnefndarfundir skulu að jafnaði hefjast kl. 14.00. Heimilt er að fella niður fundi í hreppsnefnd í allt að tvo mánuði að sumarlagi.

Aukafundi skal halda í hreppsnefnd eftir því sem þörf krefur að mati oddvita og sveitarstjóra. Skylt er að halda aukafundi í hreppsnefnd ef a.m.k. þriðjungur hreppsnefndarmanna krefst þess enda geri þeir grein fyrir ástæðum og fundarefni.

#### 7. gr.

##### *Fyrsti fundur nýkjörinnar hreppsnefndar.*

Nýkjörin hreppsnefnd tekur til starfa 15 dögum eftir kjördag.

Sá kjörinn fulltrúi sem á að baki lengstu setu í hreppsnefndinni kveður hana til fyrsta fundar eigi síðar en 15 dögum eftir að hún tekur við störfum eftir kosningar, þ.e. eigi síðar en 30 dögum eftir kjördag og stýrir fundi þar til oddviti hefur verið kjörinn. Hafi tveir eða fleiri fulltrúar í hreppsnefnd átt jafnlengi setu í hreppsnefndinni fer aldursforseti þeirra með verkefni samkvæmt þessari málsgrein.

#### 8. gr.

##### *Um kjör oddvita og varaoddvita.*

Á fyrsta fundi nýkjörinnar hreppsnefndar kys hreppsnefnd oddvita og varaoddvita. Kjörtímabil oddvita og varaoddvita er eitt ár.

Sá er rétt kjörinn oddviti eða varaoddviti sem hefur fengið atkvæði meirihluta þeirra er sæti eiga í hreppsnefndinni. Verði þeim atkvæðafjöldi eigi náð skal kjósa að nýju um þá tvo sem flest atkvæði fengu. Hafi þrír eða fleiri fengið jafnmörg atkvæði skal varpa hlutkesti um hverja tvo skuli kjósa. Verður þá sá rétt kjörinn sem fleiri atkvæði fær þó hann fái ekki helming atkvæða. Verði atkvæði jöfn skal hlutkesti ráða kosningu.

Njóti oddviti ekki lengur stuðnings meirihluta hreppsnefndar ber honum að víkja sæti og oddvitakjör fara fram á ný. Ef oddviti deyr eða forfallast varanlega frá störfum skal kjósa oddvita í hans stað til loka kjörtímabils oddvita.

#### 9. gr.

##### *Boðun hreppsnefndarfunda.*

Sveitarstjóri boðar hreppsnefndarfundi, sbr. þó 7. og 10. gr. samþykktar þessarar. Skal hann hafa sent hreppsnefndarmönnum fundarboð ásamt dagskrá og fylgigögnum þannig að þau gögn berist þeim í síðasta lagi tveimur sólarhringum fyrir hreppsnefndarfund.

## 10. gr.

*Aukafundir.*

Sveitarstjóri skal senda hreppsnefndarmönnum fundarboð aukafundar í hreppsnefnd þannig að það berist þeim ásamt dagskrá að minnsta kosti sólarhring fyrir fund.

## 11. gr.

*Auglýsing hreppsnefndarfunda.*

Íbúum Biskupstungnahrepps skal kunnbert með auglýsingu hvar og hvenær hreppsnefndarfundir eru haldnir. Miðað skal við að sem flestir íbúar sveitarfélagsins hafi greiðan aðgang að auglýsingunni.

Í upphafi kjörtímabils hreppsnefndar tekur hreppsnefnd ákvörðun um hvernig fundir hennar verði auglýstir og með hvaða fyrirvara. Skal sú ákvörðun kynnt íbúum með tryggum hætti, svo sem dreifibréfi eða auglýsingu í staðbundnu fréttablaði.

## 12. gr.

*Dagskrá hreppsnefndarfunda.*

Sveitarstjóri semur dagskrá hreppsnefndarfundar í samráði við oddvita og skal dagskráin fylgja fundarboði.

Á dagskrá hreppsnefndarfundar skal taka:

1. Lögákvæðnar kosningar, svo sem kosningar oddvita hreppsnefndar og varaoddvita, kosningar nefnda, ráða og stjórna á vegum Biskupstungnahrepps, svo og ráðningar sveitarstjóra og annarra starfsmanna í helstu stjórnunarstöður hjá hreppnum.
2. Fundargerðir hreppsráðs, nefnda, ráða og stjórna á vegum Biskupstungnahrepps, sbr. 49. gr. sveitarstjórnarlaga.
3. Önnur mál sem falla undir verksvið hreppsnefndar og sveitarstjóri og/eða oddviti ákveður að taka á dagskrá eða einhver hreppsnefndarmanna óskar að tekin verði á dagskrá. Hreppsnefndarmaður sem óskar að fá mál tekið á dagskrá hreppsnefndarfundar skal tilkynna það sveitarstjóra skriflega með tillögu eða fyrirspurn a.m.k. þremur sólarhringum fyrir fund, sbr. þó 2. mgr. 20. gr. samþykktar þessarar.

Dagskrá hreppsnefndarfunda skulu fylgja afrit fundargerða, tillagna og annarra gagna sem sveitarstjóri telur nauðsynleg til að hreppsnefndarmenn geti undirbúið sig fyrir fund. Dagskrá skal jafnframt fylgja afrit fundargerðar síðasta hreppsnefndarfundar.

Þegar dagskrá hreppsnefndarfundar hefur verið samín skal hún vera aðgengileg íbúum sveitarfélagsins á auglýsingatöflu í Aratungu og á skrifstofu Biskupstungnahrepps á auglýstum opnunartíma hennar.

## 13. gr.

*Opnir fundir.*

Hreppsnefndarfundi skal að jafnaði halda í heyranda hljóði og almenningi heimilaður aðgangur að þeim eftir því sem húsrúm leyfir.

Hreppsnefndarfundur skal haldinn í húsnæði sem fullnægir ákvæðum skipulags- og byggingarlaga og byggingarreglugerðar um aðgengi fatlaðs fólks.

Hreppsnefnd getur ákveðið að einstök mál verði rædd fyrir luktum dyrum þegar það telst nauðsynlegt vegna eðlis málsins, svo sem viðkvæm einkamál manna eða viðskiptamál sem æskilegt er vegna hagsmuna hreppsins að rædd verði fyrir luktum dyrum. Jafnframt getur hreppsnefnd ákveðið að hreppsnefndarfundur þar sem eingöngu er fjallað um slík mál verði haldinn fyrir luktum dyrum.

Tillaga um að mál skuli rædd fyrir luktum dyrum skal afgreidd umræðulaust í hreppsnefnd.

Óheimilt er að skýra frá því sem fram kemur við umræður á lokuðum fundi í hreppsnefnd.

## 14. gr.

*Fundarritarar.*

Hreppsnefnd getur kosið tvo skrifara og tvo varaskrifara úr hópi hreppsnefndarmanna til eins árs í senn á sama fundi og oddvitakosning fer fram. Skrifarar skulu telja saman atkvæði við kosningar og þegar atkvæðagreiðslur fara fram í hreppsnefndinni.

Einnig getur hreppsnefnd ákveðið að ráða fundarritara utan hreppsnefndar til að annast ritun fundargerða í gerðabók hreppsnefndar.

## 15. gr.

*Fundargerðir.*

Í fundargerð skal getið hvar og hvenær fundur er haldinn og hverjir sitji fundinn. Skrá skal þau mál sem tekin eru fyrir, dagsetningu þeirra, aðila máls og meginefni og hvernig mál eru afgreidd. Sé mál ekki afgreitt samhljóða skal greina í fundargerð hvernig atkvæði hafa skipst.

Þegar lagðar eru fram fundargerðir nefnda nægir að skrá í fundargerð hreppsnefndar um hvaða nefndir er að ræða og dagsetningu fundargerða.

Mál sem tekin eru fyrir á lokuðum fundi skal skrá sem trúnaðarmál.

Í lok fundar skal fundargerð lesin upp og skulu allir viðstaddir fundarmenn undirrita hana nema hreppsnefnd ákveði annað.

Hreppsnefnd getur ákveðið að fundargerðir verði skráðar í tölvu. Verði það gert skal bóka í gerðabók hreppsnefndar númer fundar, hver skráði, hvenær fundurinn er haldinn og að fundargerð sé færð í tölvu. Þá skal færa í gerðabók fundarslit og greina blaðsíðutal fundargerðar. Viðstaddir hreppsnefndarmenn skulu rita nöfn sín við slit fundar í gerðabók. Í lok fundarins skal tölvuskráð fundargerð prentuð út og hún undirrituð af fundarmönnum. Einnig skal oddviti og a.m.k. einn fundarmanna setja upphafsstafi sína undir hverja blaðsíðu fundargerða sem blaðsíðusettar skulu í áframhaldandi töluröð. Undirritaðar tölvuskráðar fundargerðir skulu reglulega bundnar inn til varanlegrar varðveislu.

Hreppsnefndarmaður sem gera vill athugasemd við eitthvert atriði í fundargerð getur undirritað fundargerðina með fyrirvara um það atriði.

Hreppsnefnd getur ákveðið að umræður á hreppsnefndarfundum verði hljóðritaðar eða teknar upp með öðrum hætti. Verði það ákveðið skal hreppsnefnd setja um það nánari reglur.

## 16. gr.

*Hæfi hreppsnefndarmanna.*

Hreppsnefndarmanni ber að víkja sæti við umræður og afgreiðslu máls þegar það varðar hann eða nána venslamenn hans svo sérstaklega að almennt má ætla að viljaafstaða hans mótist að einhverju leyti þar af.

Hreppsnefndarmenn eru ekki vanhæfir þegar verið er að velja fulltrúa til trúnaðarstarfa á vegum hreppsnefndarinnar eða ákveða þóknun fyrir slík störf.

Hreppsnefndarmenn sem jafnframt eru starfsmenn hreppsins og hafa sem slíkir átt þátt í að undirbúa tiltekið mál sem lagt er fyrir hreppsnefndina eru alltaf vanhæfir þegar hreppsnefnd fjallar um málið. Þetta á þó hvorki við um sveitarstjóra né þegar hreppsnefndin fjallar um og afgreiðir fjárhagsáætlanir og ársreikninga Biskupstungnahrepps.

Hreppsnefndarmanni sem veit hæfi sitt orka tvímælis ber að vekja athygli hreppsnefndar á því. Hreppsnefndarmanni er heimilt við meðferð máls sem hann er vanhæfur að afgreiða að gera stuttlega grein fyrir afstöðu sinni. Hreppsnefnd sker umræðulaust úr um hvort mál er svo vaxið að einhver hreppsnefndarmanna sé vanhæfur. Hreppsnefndarmaður sem hlut á að máli má taka þátt í atkvæðagreiðslu um hæfi sitt.

Hreppsnefndarmaður sem vanhæfur er við úrlausn máls skal yfirgefa fundarsal hreppsnefndar við meðferð og afgreiðslu þess.

## 17. gr.

*Ályktunarhæfi og atkvæðagreiðsla.*

Hreppsnefndarfundur er lögmætur ef meira en helmingur hreppsnefndarmanna er mættur á fundinn og getur hreppsnefnd enga bindandi ályktun gert nema hreppsnefndarfundur sé lögmætur.

Á hreppsnefndarfundum ræður afl atkvæða úrslitum mála. Hjáseta telst þátttaka í atkvæðagreiðslu.

Ef jafnmörg atkvæði eru með málefni og móti því fellur það en við kosningar ræður hlutkesti.

Þegar um meirihlutakosningu er að ræða, svo sem við kjör eins fulltrúa skal kosning fara fram eins og við oddvitakjör.

Kosningar skulu ávallt vera skriflegar og leynilegar.

Atkvæðagreiðsla á hreppsnefndarfundum fer að jafnaði fram með handauppréttingu. Oddviti biður hreppsnefndarmenn sem samþykkja mál að rétta upp hönd sína. Að því búnu leitar oddviti mótatkvæða með sama hætti. Loks skýrir oddviti frá úrslitum atkvæðagreiðslunnar.

Ef mál er svo vaxið að oddviti telur ástæðulaust að atkvæðagreiðsla fari fram um það skýrir hann frá því að hann telji mál samþykkt eða fellt án atkvæðagreiðslu nema athugasemd verði við það gerð.

Oddviti getur ákveðið að mál verði afgreitt með nafnakalli. Einnig ber oddvita að láta fara fram nafnakall ef a.m.k. þriðjungur hreppsnefndarmanna óskar þess. Við nafnakall skal farið eftir tölusettri nafnaskrá hreppsnefndarmanna í stafrófsröð og skal það ráðast af útdrætti hvaða hreppsnefndarmaður greiðir fyrst atkvæði við nafnakall. Við nafnakall skal oddviti greiða atkvæði síðastur. Við nafnakall svarar hreppsnefndarmaður, þegar oddviti les upp nafn hans, já eða nei eftir því hvort hann er með eða móti eða tekur fram að hann greiði ekki atkvæði en slík afstaða telst þó þátttaka í atkvæðagreiðslu.

Heimilt er að afgreiða mál með skriflegri atkvæðagreiðslu ef hreppsnefndarmaður óskar og hreppsnefnd samþykkir.

## 18. gr.

*Hlutverk oddvita.*

Oddviti hreppsnefndar stýrir fundi hennar. Hann setur fund, kannar lögmæti hans, stjórnar umræðum og afgreiðslu mála og slítur fundi þegar dagskrá hans er tæmd. Jafnframt sér hann um að fundargerðir séu skipulega færðar í gerðabók hreppsnefndarinnar og að allar ályktanir og samþykktir séu rétt og nákvæmlega bókaðar.

Oddviti úrskurðar um skilning á fundarsköpum en skjóta má úrskurði hans til úrlausnar hreppsnefndar.

Oddviti sér um að allt fari skipulega og löglega fram á hreppsnefndarfundum og er hreppsnefndarmönnum skylt að lúta valdi hans að því er varðar fundarsköp og góða reglu. Raski áheyrandi fundarfriði getur oddviti vísað honum úr fundarsal.

Leyfi oddvita þarf til að taka myndir og hljóðrita umræður á hreppsnefndarfundum.

## 19. gr.

*Varamenn.*

Varamenn taka sæti í hreppsnefnd í þeirri röð sem þeir eru kosnir. Ef hreppsnefnd hefur verið kjörin bundinni hlutfallskosningu taka varamenn sæti í þeirri röð sem þeir eru kosnir þegar aðalmenn þess lista sem þeir eru kosnir af forfallast.

## 20. gr.

*Umræður í hreppsnefnd.*

Mál skulu tekin til umræðu og afgreiðslu í hreppsnefnd í þeirri röð sem þau eru á dagskrá nema oddviti eða hreppsnefnd ákveði annað.

Heimilt er að taka til meðferðar á hreppsnefndarfundi mál sem ekki hafa verið á dagskrá ef 2/3 viðstaddra hreppsnefndarmanna samþykkja slíkt.

Telji oddviti umræður dragast úr hófi fram getur hann lagt fram dagskrártillögu um að ræðutími hvers hreppsnefndarmanns verði takmarkaður, umræðum verði lokið á tilteknum tíma eða umræðum um mál verði lokið þá þegar. Hver hreppsnefndarmaður getur og borið fram slíkar tillögur. Hreppsnefnd afgreiðir tillögur um takmörkun umræðna umræðulaust.

Hreppsnefndarmaður skal beina máli sínu til oddvita eða fundarins.

Þegar til umræðu er fundargerð hreppsráðs, annarrar nefndar, ráðs eða stjórnar skal hreppsnefndarmaður taka fram hvaða lið/liði fundargerðarinnar hann óskar að ræða.

Ekki má hreppsnefndarmaður lesa upp prentað mál við umræður í hreppsnefnd nema með leyfi oddvita.

Hreppsnefndarmaður getur borið fram breytingartillögu, viðaukatillögu, frávisunartillögu eða frestunartillögu við hvert það mál sem til umræðu er á fundi. Slíkar tillögur skulu vera skriflegar ef oddviti óskar. Oddviti ákveður í hvaða röð og með hvaða hætti slíkar tillögur eru teknar til afgreiðslu.

## 21. gr.

*Tvær umræður í hreppsnefnd.*

Hreppsnefnd afgreiðir mál að jafnaði við eina umræðu. Þó skal hafa tvær umræður með a.m.k. einnar viku millibili um eftirtalin málefni:

1. Fjárhagsáætlanir Biskupstungnahrepps, stofnana hans og fyrirtækja.
2. Ársreikninga Biskupstungnahrepps, stofnana hans og fyrirtækja.
3. Samþykktir, reglugerðir og gjaldskrár sem hljóta eiga staðfestingu ráðherra.
4. Áætlanir fyrir Biskupstungnahrepp sem gilda eiga til lengri tíma, svo sem þriggja ára áætlanir og skipulags- og framkvæmdaáætlanir.
5. Tilkynningu til eftirlitsnefndar skv. 75. gr. sveitarstjórnarlaga.

## 22. gr.

*Afgreiðsla mála í hreppsnefnd.*

Mál er afgreitt í hreppsnefnd með því að samþykkja það eða fella það, vísa því frá hreppsnefnd eða vísa því til afgreiðslu hreppsráðs, annarrar nefndar, ráðs eða stjórnar eða sveitarstjóra.

Máli sem hreppsnefnd ber að lögum að afgreiða verður þó eigi vísað til afgreiðslu annarra.

Hreppsnefnd er heimilt að fresta afgreiðslu máls nema um sé að ræða mál sem að lögum ber að afgreiða fyrir tiltekinn tíma.

Sveitarstjóri hefur á hendi framkvæmd þeirra ákvarðana sem hreppsnefnd tekur.

Öllum erindum sem berast til hreppsnefndar ber að svara skriflega.

## III. KAFLI

**Um réttindi og skyldur hreppsnefndarmanna.**

## 23. gr.

*Mæting á fundi o.fl.*

Hreppsnefndarmanni er skylt að sækja hreppsnefndarfundi nema lögmet forföll hamli, svo sem önnur brýnni skyldustörf eða veikindi.

Sé hreppsnefndarmaður forfallaður um stundarsakir skal hann tilkynna eða láta tilkynna forföllin til sveitarstjóra sem boðar þá varamann hans á fund. Sveitarstjóri skal sitja fundi hreppsnefndar með málfrelsi og tillögurétt en ekki hefur hann atkvæðisrétt nema hann sé kjörinn hreppsnefndarmaður.

## 24. gr.

*Málfrelsi, tillöguréttur, atkvæðisréttur o.fl.*

Hreppsnefndarmaður hefur málfrelsi, tillögurétt og atkvæðisrétt á hreppsnefndarfundum.

Hreppsnefndarmanni er ekki skylt að taka þátt í atkvæðagreiðslu um einstök mál. Þegar um er að ræða mál sem hreppsnefnd er að lögum skylt að afgreiða, svo sem fjárhagsáætlun, ársreikninga eða kjör fulltrúa í lögboðnar nefndir, getur oddviti ákveðið að endurtaka atkvæðagreiðslu ef minna en helmingur hreppsnefndarmanna tekur þátt í atkvæðagreiðslunni.

Hreppsnefndarmaður sem taka vill til máls skal óska heimildar oddvita. Að jafnaði skulu hreppsnefndarmenn taka til máls í þeirri röð sem þeir hafa kvatt sér hljóðs. Víkja má frá þeirri reglu ef um er að ræða sveitarstjóra, framsögumann í máli eða hreppsnefndarmann sem óskar að gera stutta athugasemd eða koma leiðréttingu á framfæri.

Hreppsnefnd getur heimilað að maður utan hreppsnefndar kveðji sér hljóðs á hreppsnefndarfundi.

Beri hreppsnefndarmaður aðra menn brigslum skal oddviti víta hann. Oddviti getur lagt til við hreppsnefnd að hreppsnefndarmaður sem víttur hefur verið tvisvar á sama fundi verði sviptur málfrelsi á þeim fundi. Skal slík tillaga afgreidd umræðulaust. Hlýðnist hreppsnefndarmaður ekki úrskurði oddvita eða hreppsnefndar eða ef óregla kemur upp á fundi skal oddviti gera fundarhlé, fresta fundi og slíta fundi ef nauðsyn krefur.

## 25. gr.

*Skylda að taka kjöri.*

Aðal- og varamönnum í hreppsnefnd er skylt að taka kjöri í nefnd, ráð eða stjórn á vegum Biskupstungnahrepps. Þó getur sá sem verið hefur oddviti eitt kjörtímabil eða lengur eða setið í hreppsráði eða annarri nefnd sama tímabil skorast undan kosningu jafnlangan tíma og hann hefur haft starfið á hendi.

Hver hreppsnefndarmaður er skyldur til að taka að sér þau störf sem hreppsnefnd felur honum og varða verkefni hreppsnefndarinnar.

## 26. gr.

*Afstaða til einstakra mála.*

Hreppsnefndarmanni ber að gegna störfum sínum í hreppsnefnd af alúð og samvisku-semi og gæta hagsmuna Biskupstungnahrepps en í störfum sínum er hreppsnefndarmaður einungis bundinn af lögum og sannfæringu sinni.

Vilji hreppsnefndarmaður ekki una úrskurði oddvita varðandi stjórn og fundarsköp getur hann skotið úrskurðinum til hreppsnefndar sem sker úr án umræðu.

## 27. gr.

*Aðgangur að gögnum.*

Aðalmenn í hreppsnefnd skulu vegna starfa sinna í hreppsnefnd hafa aðgang að bófum og skjölum hreppsins og óhindraðan aðgang að stofnunum hans og starfsemi.

## 28. gr.

*Bókanir í fundargerð.*

Hreppsnefndarmaður á rétt á að fá bókaða stutta athugasemd um afstöðu sína til þeirra mála sem til umræðu eru í hreppsnefnd.

## 29. gr.

*Pagnarskylda.*

Hreppsnefndarmaður skal gæta þagnarskyldu um það sem hann fær vitneskju um í starfi sínu og leynt á að fara vegna einka- eða almannahagsmuna samkvæmt lögum eða eðli máls. Þagnarskylda helst áfram eftir að hreppsnefndarmaður lætur af þeim störfum.

## 30. gr.

*Lausn frá störfum.*

Nú telur hreppsnefndarmaður sig ekki geta gegnt skyldum sínum í hreppsnefndinni án óhæfilegs álags og getur hreppsnefndin þá létt af honum störfum eða veitt honum lausn að eigin ósk um tiltekinn tíma eða til loka kjörtímabils.

Varamaður tekur þá sæti hans skv. 19. gr. samþykktar þessarar og 24. gr. sveitarstjórnarlaga.

Missi hreppsnefndarmaður kjörgengi skal hann víkja úr hreppsnefndinni, sbr. þó ákvæði 4. mgr. 24. gr. sveitarstjórnarlaga.

Nú er hreppsnefndarmaður af einhverjum ástæðum sviptur fjárforræði, svo sem ef bú hans er tekið til gjaldþrotaskipta og skal hreppsnefndin þá veita honum lausn frá störfum þann tíma er sviptingin gildir.

## 31. gr.

*Þóknun og ferðakostnaður.*

Hreppsnefndarmaður skal fá hæfilega þóknun úr sveitarsjóði fyrir störf sín í hreppsnefnd. Ef um langan veg er að fara milli heimilis hreppsnefndarmanns og fundarstaðar hreppsnefndar getur hreppsnefndin auk þess ákveðið að hann skuli fá hæfilega greiðslu vegna ferðakostnaðar. Takist hreppsnefndarmaður á hendur ferð á vegum hreppsnefndar samkvæmt ákvörðun nefndarinnar á hann rétt á greiðslu ferða- og dvalarkostnaðar.

Hreppsnefnd setur nánari reglur um greiðslur skv. 1. mgr.

## 32. gr.

*Orlof o.fl.*

Haga skal fundum hreppsnefndar þannig að hreppsnefndarmaður eigi möguleika á að taka sér orlof árlega.

## 33. gr.

*Varamenn.*

Ákvæði þessa kafla um réttindi og skyldur hreppsnefndarmanna gilda einnig um varamenn sem taka sæti í hreppsnefndinni.

## IV. KAFLI

**Nefndir, ráð og stjórnir.**

## 34. gr.

Hreppsnefnd kýs fulltrúa í eftirtaldar nefndir, ráð, stjórnir og embætti:

A. **Til eins árs.** Á fundi í júní ár hvert:

1. *Oddvitakjör.* Oddviti og varaoddviti skv. 14. gr. sveitarstjórnarlaga nr. 45/1998.



2. *Hreppsráð*. Þrír hreppsnefndarmenn sem aðalmenn og jafnmargir til vara skv. 38. gr. sveitarstjórnarlaga nr. 45/1998.
3. *Aðalfundur SASS*. Þrír fulltrúar og þrír til vara.
- B. **Til fjögurra ára**. Á fyrsta eða öðrum fundi að afloknum sveitarstjórnarkosningum:
  1. *Kjörstjórn*. Þrír aðalmenn og jafnmargir til vara. Kjörstjórn fer með alþingiskosningar skv. 15. gr. laga um kosningar til Alþingis nr. 24/2000. Kjörstjórn fer jafnframt með kosningar til sveitarstjórnar skv. 14. gr. laga um kosningar til sveitarstjórna nr. 5/1998.
  2. *Skoðunarmenn*. Tveir aðalmenn og jafnmargir til vara skv. 69. gr. sveitarstjórnarlaga nr. 45/1998.
  3. *Húsnæðisnefnd*. Þrír aðalmenn og jafnmargir til vara skv. 6. gr. laga nr. 44/1998 um húsnæðismál.
  4. *Fræðslunefnd*. Þrír aðalmenn og jafnmargir til vara. Fræðslunefnd fer með málefni grunnskóla skv. 13. gr. laga um grunnskóla nr. 66/1995 og leikskóla skv. 9. gr. laga um leikskóla nr. 78/1994. Jafnframt fer fræðslunefnd með málefni tónlistarskólans skv. 2. gr. laga um fjárhagslegan stuðning við tónlistarskóla nr. 75/1985.
  5. *Atvinnumálanefnd*. Þrír aðalmenn og jafnmargir til vara. Atvinnumálanefnd fer með atvinnumál Biskupstungnahrepps. Auk þess að styrkja þær atvinnugreinar sem fyrir eru er henni ætlað að stuðla að nýsköpun og fjölbreytni í atvinnumálum hreppsins.
  6. *Samgöngumálanefnd*. Þrír aðalmenn og jafnmargir til vara. Samgöngumálanefnd fer með samgöngumál Biskupstungnahrepps og skal hún vinna að bættum samgöngum og samgönguleiðum.
  7. *Umhverfisnefnd*. Fimm aðalmenn og þrír til vara. Auk þess að vinna að fegrun umhverfis, er nefndinni ætlað að vinna að náttúruvernd, s.s. varðveislu náttúruminja og annarra menningarlegra verðmæta í Biskupstungnahreppi
  8. *Brunavarnanefnd*. Þrír aðalmenn og þrír til vara. Brunavarnanefnd skal hafa eftirlit með og vinna að bættum brunavörnum í Biskupstungnahreppi.
  9. *Fjallskilanefnd*. Fimm aðalmenn og þrír til vara. Fjallskilanefnd fer með fjallskilamál skv. lögum um afréttamálefni nr. 6/1986 og fjallskilasamþykkt fyrir Árnassýslu nr. 472/1991.
  10. *Forðagæslumenn*. Tveir aðalmenn og tveir til vara sem fara með búfjárefirlit samkvæmt lögum nr. 46/1991.
  11. *Rekstrarnefnd*. Þrír fulltrúar og þrír til vara. Rekstrarnefnd hefur á hendi umsjón með rekstri og viðhaldi Aratungu og íþróttamiðstöðvar Biskupstungna.
  12. *Bókasafnsnefnd*. Tveir fulltrúar og tveir til vara.
  13. *Skipulagsnefnd*. Hreppsnefnd fer með málefni skipulagsnefndar.
  14. *Stjórn Hitaveitu Reykholts*. Þrír aðalmenn og þrír til vara.
  15. *Stjórn Hitaveitu Laugaráss*. Fimm aðalmenn og þrír til vara.
  16. *Aðalfundur Sambands íslenskra sveitarfélaga*. Einn fulltrúi og einn til vara.
  17. *Héraðsnefnd*. Einn fulltrúi og einn til vara.
  18. *Stjórn Landgræðslufélags Biskupstungna*. Einn fulltrúi og einn til vara.
  19. *Stjórn heilsugæslustöðvar*. Þrír fulltrúar kosnir af sveitarstjórnnum uppsveita Árnassýslu, sbr. 21. gr. laga um heilbrigðisþjónustu nr. 97/1990.
  20. *Þjónustuhópur aldraðra*. Einn fulltrúi, sbr. 7. gr. laga um málefni aldraðra nr. 125/1989. Samkvæmt erindisbréfi félagsmálanefndar skal formaður nefndarinnar vera fulltrúi sveitarfélaganna sem að henni standa í þjónustuhópi aldraðra og fer nefndin að öðru leyti með málefni aldraðra.
  21. *Byggingarnefnd*. Einn fulltrúi og einn til vara. Samstarfsnefnd sveitarfélaga í uppveitum Árnassýslu.
  22. *Félagsmálanefnd*. Einn fulltrúi og einn til vara. Samstarfsnefnd sveitarfélaga í uppveitum Árnassýslu.

## 35. gr.

*Kosning hreppsráðs.*

Hreppsnefnd skal á fyrsta fundi að afloknum sveitarstjórnarkosningum kjósa þrjá hreppsnefndarmenn í hreppsráð til eins árs og jafnmarga til vara. Aðalmenn í hreppsnefnd eru einir kjörgengir sem aðalmenn í hreppsráð.

Skylt er hreppsnefnd að gefa fulltrúa flokks eða framboðsaðila sem fulltrúa á í hreppsnefnd en ekki hefur fengið kjörinn hreppsráðsmann að tilnefna fulltrúa til setu í hreppsráði með málfrelsi og tillögurétt þann tíma sem fundir hreppsnefndar falla niður vegna sumarleyfa.

## 36. gr.

*Hlutverk hreppsráðs.*

Hreppsráð fer ásamt sveitarstjóra með framkvæmdastjórn Biskupstungnahrepps og fjármálastjórn að því leyti sem slík stjórn er ekki öðrum falin.

Hreppsráð hefur umsjón með stjórnarsýslu Biskupstungnahrepps og undirbúningi árlegrar fjárhagsáætlunar, það semur drög að fjárhagsáætlun sveitarsjóðs og fyrirtækja/stofnana Biskupstungnahrepps að fengnum tillögum hlutaðeigandi stjórna og leggur þau fyrir hreppsnefnd í samræmi við ákvæði sveitarstjórnarlaga. Þá sér hreppsráð um að ársreikningar sveitarsjóðs séu samdir og þeir ásamt ársreikningum fyrirtækja/stofnana Biskupstungnahrepps lagðir fyrir hreppsnefnd til afgreiðslu svo sem sveitarstjórnarlög mæla fyrir um.

Hreppsráð gerir tillögur til hreppsnefndar um afgreiðslu einstakra mála sem það fær til meðferðar. Hreppsráði er þó heimil fullnaðarafgreiðsla mála sem ekki varða verulega fjárhag sveitarsjóðs eða fyrirtækja/stofnana hans enda sé ekki ágreiningur milli hreppsráðsmanna eða við sveitarstjóra um slíka afgreiðslu.

Hreppsráð ákveður skiptingu og ráðstöfun fjár sem ætlað er til einstakra málaflokka samkvæmt fjárhagsáætlun, svo sem til gatnagerðar, nýbygginga og óvissra útgjalda.

Þá getur hreppsnefnd falið hreppsráði fullnaðarafgreiðslu mála nema lög mæli á annan veg.

## 37. gr.

*Fundir hreppsráðs og fundargerðir.*

Hreppsráð skal að jafnaði halda einn fund í mánuði milli hreppsnefndarfunda fyrsta þriðjudag hvers mánaðar. Heimilt er þó að færa til dagsetningu fundar og fundartíma ef þörf krefur. Aukafundi skal halda ef sveitarstjóri, formaður hreppsráðs eða a.m.k. tveir hreppsráðsmenn óska þess.

Á fyrsta fundi nýkjörins hreppsráðs skal kjósa formann, varaformann og ritara hreppsráðs. Hreppsráð getur ráðið sér fundarritara utan hreppsráðs.

Formaður hreppsráðs stjórnar fundum þess og sér um að allt fari löglega og skipulega fram á fundum þess. Hann úrskurðar í ágreiningsmálum sem upp kunna að koma út af fundarsköpum en skjóta má úrskurði hans til úrlausnar hreppsráðs.

Heimilt er að taka mál til meðferðar í hreppsráði þótt ekki sé það tilgreint í dagskrá. Þó er skylt að fresta afgreiðslu slíks máls ef einhver hreppsráðsmaður óskar þess.

Sveitarstjóri situr hreppsráðsfundi með málfrelsi og tillögurétt en hann hefur ekki atkvæðisrétt nema hann sé kjörinn fulltrúi í hreppsnefnd.

Um ritun fundargerða hreppsráðs gilda sömu reglur og um ritun fundargerða hreppsnefndar, sbr. 15. gr. samþykktar þessarar.

## 38. gr.

*Afgreiðsla fundargerða hreppsráðs.*

Fundargerðir hreppsráðs skulu lagðar fyrir hreppsnefnd til samþykktar, sbr. þó 3. mgr. 36. gr. samþykktar þessarar.

## 39. gr.

*Boðun hreppsráðsfunda.*

Sveitarstjóri undirbýr hreppsráðsfundi í samráði við formann hreppsráðs. Hann sér um að hreppsráð sé boðað til fundar með skriflegu fundarboði ásamt dagskrá a.m.k. einum sólarhring fyrir fund.

Geti hreppsráðsmaður ekki sótt fund skal hann tilkynna sveitarstjóra um forföll og boðar sveitarstjóri varamann hans á fund.

## 40. gr.

*Kosning og kjörgengi í aðrar nefndir, ráð og stjórnir.*

Hreppsnefnd kýs fulltrúa í nefndir, ráð og stjórnir samkvæmt ákvæðum laga, reglugerða og samþykktar þessarar og veitir þeim lausn frá störfum. Slíkar kosningar skulu vera leyfilegar bundnar hlutfallskosningar ef einhver hreppsnefndarmanna óskar þess.

Hreppsnefnd kýs formenn nefnda.

Starfsmenn fyrirtækja og stofnana Biskupstungnahrepps eru ekki kjörgengir í nefndir, ráð og stjórnir þeirra fyrirtækja eða stofnana er þeir starfa hjá.

Hreppsnefnd getur kosið nefndir til að vinna að einstökum afmörkuðum verkefnum. Umboð slíkra nefnda fellur niður við lok kjörtímabils hreppsnefndarinnar og fyrir ef verkefni nefndar er lokið. Hreppsnefnd getur þó afturkallað umboð slíkra nefnda hvenær sem er.

## 41. gr.

*Varamenn.*

Þegar aðalmaður í nefnd forfallast á einhvern hátt um stundarsakir eða varanlega skal varamaður taka sæti hans. Ef tveir eða fleiri framboðsaðilar hafa haft samstarf um nefndarkosningar skal sá aðili sem tilnefndi viðkomandi til setu í nefnd einnig tilnefna varamann hans.

## 42. gr.

*Boðun fyrsta fundar.*

Sveitarstjóri sér um að boða nýkjörna nefnd til fyrsta fundar í samráði við formann hennar og leggur fram erindisbréf viðkomandi nefndar.

Á fyrsta fundi nefndar skal kjósa varaformann og ritara nefndar.

Formaður nefndar boðar eða lætur boða fundi í nefnd með a.m.k. eins sólarhrings fyrirvara.

## 43. gr.

*Fundir nefnda, ráða og stjórna.*

Nefndarfundur skal haldinn fyrir luktum dyrum.

Nefnd getur kvatt á sinn fund einstaka starfsmenn Biskupstungnahrepps. Enn fremur getur nefnd boðið aðila að koma á sinn fund til viðræðna um tiltekin mál.

Formaður nefndar stýrir fundum.

Ákvæði II. og III. kafla samþykktar þessarar gilda um meðferð mála í nefndum, ráðum og stjórnnum hreppsins eftir því sem við á.

## 44. gr.

*Hlutverk og valdsvið nefnda.*

Um hlutverk og valdsvið nefnda, ráða og stjórna á vegum Biskupstungnahrepps fer eftir því sem kveðið er á um í erindisbréfi viðkomandi nefndar, lögum og reglugerðum.

Hreppsnefnd getur falið nefnd fullnaðarafgreiðslu einstakra mála eða málaflokka nema slíkt vald sé að lögum sérstaklega falið hreppsnefnd til ákvörðunar.

## 45. gr.

*Fundargerðir.*

Nefndir, ráð og stjórnir Biskupstungnahrepps skulu halda gerðabækur. Kjörinn ritari nefndar skal færa fundargerð í gerðabók. Nefnd getur þó ráðið sér sérstakan fundarritara utan nefndar.

Sé um ráðgefandi nefnd að ræða sem ekki hefur verið falin fullnaðarafgreiðsla máls samkvæmt lögum eða samþykkt þessari teljast ályktanir hennar tillögur til hreppsnefndar enda þótt þær séu orðaðar sem ákvarðanir eða samþykktir nefndar.

Um ritun fundargerða nefnda, ráða og stjórna gilda sömu reglur og um ritun fundargerða hreppsnefndar, sbr. 15. gr. samþykktar þessarar.

## 46. gr.

*Afgreiðsla fundargerða.*

Fundargerðir nefnda, ráða og stjórna Biskupstungnahrepps skulu teknar á dagskrá hreppsráðs og skal það gert svo fljótt sem unnt er að afloknum nefndarfundi. Ef fundargerðir innihalda ekki ályktanir eða tillögur sem þarfnast sérstakrar staðfestingar eru þær lagðar fram til kynningar.

Ef ályktanir eða tillögur þarfnast staðfestingar hreppsráðs og/eða hreppsnefndar ber að taka þær sérstaklega fyrir.

Hafi ályktun nefndar, ráðs eða stjórnar í för með sér fjárútlát umfram áður veittar heimildir skal ályktun ætíð lögð fyrir hreppsnefnd.

## 47. gr.

*Réttindi og skyldur fulltrúa í nefndum, ráðum og stjórnnum.*

Nefndarmanni er skylt að sækja fundi nefndar nema lögmæt forföll hamli.

Ákvæði II., III. og IV. kafla samþykktar þessarar gilda að öðru leyti um fulltrúa í nefndum, ráðum og stjórnnum eftir því sem við á.

## V. KAFLI

**Um framkvæmdastjórn og starfslið Biskupstungnahrepps.**

## 48. gr.

*Ráðning sveitarstjóra.*

Hreppsnefnd ræður sveitarstjóra og gerir við hann skriflegan ráðningarsamning þar sem m.a. skal kveðið á um ráðningartíma hans, kaup og kjör.

Ráðningarsamningur skal staðfestur af hreppsnefnd.

## 49. gr.

*Ef ekki er ráðinn sveitarstjóri.*

Ef ekki er ráðinn sérstakur framkvæmdastjóri hreppsins hefur oddviti með höndum daglega stjórn hans, undirbýr fundi hreppsnefndar og hreppsráðs, annast framkvæmd ákvarðana hreppsnefndar og hreppsráðs og annarra málefna hreppsins, svo sem bréfaskipti, gjaldheimtu og reikningshald.

Laun oddvita ef ekki er starfandi sveitarstjóri skulu ákveðin sérstaklega af hreppsnefndinni. Skulu launin endurskoðuð reglulega í samræmi við almennar launabreytingar í landinu.

Ef um er að ræða sérstakar, umfangsmiklar og tímabundnar framkvæmdir á vegum Biskupstungnahrepps sem oddviti sér um á hann rétt á sérstakri þóknun fyrir störf samkvæmt ákvörðun hreppsnefndar.

## 50. gr.

*Verksvið sveitarstjóra.*

Sveitarstjóri undirbýr fundi hreppsráðs og hreppsnefndar, semur dagskrá og boðar til funda. Hann á sæti á fundum hreppsnefndar og hreppsráðs og hefur þar málfrelsi og tilögurétt en eigi atkvæðisrétt nema hann sé kjörinn fulltrúi í hreppsnefnd/hreppsráði. Hann hefur og rétt til setu á fundum nefnda hreppsins með sömu réttindum.

Sveitarstjóri hefur á hendi framkvæmd ákvarðana hreppsnefndar og málefna Biskupstungnahrepps að svo miklu leyti sem hreppsnefnd hefur ekki ákveðið annað.

Sveitarstjóri er prókúruhafi sveitarsjóðs. Hann undirritar skjöl varðandi kaup og sölu fasteigna Biskupstungnahrepps, lántökur og aðrar skuldbindingar eða ráðstafanir sem samþykki hreppsnefndar þarf til.

Sveitarstjóra er heimilt með samþykki hreppsnefndar að veita öðrum starfsmanni hreppsins prókúru. Prókúruhafar Biskupstungnahrepps skulu vera fjár síns ráðandi.

Sveitarstjóri er æðsti yfirmaður annars starfslíðs hreppsins.

Sveitarstjóri ákveður hver gegna skuli störfum hans í forföllum hans.

## 51. gr.

*Ráðning annarra starfsmanna.*

Hreppsnefnd ræður starfsmenn í helstu stjórnunarstöður hjá Biskupstungnahreppi, svo sem yfirmenn stofnana og deilda hreppsins og veitir þeim lausn frá störfum.

Sveitarstjóri og yfirmenn stofnana sjá um ráðningu annars starfsfólks.

Um kaup og kjör fer eftir kjarasamningum viðkomandi stéttarfélaga.

Um starfskjör, réttindi og skyldur starfsmanna sveitarfélagsins fer eftir ákvæðum kjarasamninga hverju sinni og/eða ákvæðum ráðningarsamninga.

Skylt er starfsmönnum sveitarfélagsins að sitja fundi hreppsráðs/hreppsnefndar ef þess er óskað.

## VI. KAFLI

**Um fjármálastjórn Biskupstungnahrepps.**

## 52. gr.

*Almennt um bókhald og reikningsskil Biskupstungnahrepps.*

Sveitarsjóður, stofnanir hans og fyrirtæki eru bókhaldsskyld.

Bókhaldi skal hagað á skýran og aðgengilegan hátt og skulu reikningsskil gefa glögga mynd af rekstri og efnahag hreppsins í heild.

Að svo miklu leyti sem við á gilda ákvæði laga um bókhald og ársreikninga, svo og aðrar góðar bókhalds- og reikningsskilavenjur.

## 53. gr.

*Reikningsárið.*

Reikningsár Biskupstungnahrepps skal vera almanaksárið.

## 54. gr.

*Fjárhagsáætlun.*

Fyrir lok janúarmánaðar ár hvert skal hreppsnefnd afgreiða fjárhagsáætlun sveitarsjóðs, fyrirtækja og stofnana Biskupstungnahrepps fyrir yfirstandandi ár að undangengnum tveimur umræðum í hreppsnefnd með a.m.k. einnar viku millibili.

Ef ekki tekst að afgreiða fjárhagsáætlun fyrir lok frestsins skal sækja skriflega um frest til félagsmálaráðuneytisins og tilgreina ástæður fyrir umsókninni.

Form fjárhagsáætlunar skal vera í samræmi við form ársreiknings. Í fjárhagsáætlun skal

koma fram rekstrar- og framkvæmdaáætlun, áætlun um efnahag í upphafi og lok árs, auk áætlaðra fjármagnshreyfinga.

Við afgreiðslu fjárhagsáætlunar tekur hreppsnefnd ákvarðanir um nýtingu tekjustofna sveitarsjóðs og tekjuöflun, um öflun lánsfjár ef um það er að ræða og um ráðstöfun fjármuna á fjárhagsárinu bæði til rekstrar og eignabreytinga. Þá skal við gerð fjárhagsáætlunar hafa hliðsjón af fjárhagslegri stöðu sveitarsjóðs í byrjun fjárhagsársins.

55. gr.

*Breyting á fjárhagsáætlun.*

Hafi forsendur fyrir gerð fjárhagsáætlunar breyst er hreppsnefnd heimilt að endurskoða fjárhagsáætlunina. Slíkar breytingar afgreiðir hreppsnefnd við eina umræðu enda hafi breytingartillögurnar verið sendar öllum fulltrúum í hreppsnefnd með dagskrá viðkomandi hreppsnefndarfundar.

Samþykki hreppsnefnd fjárveitingu eða útgjöld utan fjárhagsáætlunar skal hún jafnframt taka ákvörðun um hvernig afla skuli fjár til þeirra útgjalda, svo sem með lækkun annarra útgjalda, auknum tekjum eða lánsfé. Samþykki slíkrar fjárveitingar telst breyting á fjárhagsáætluninni.

56. gr.

*Þriggja ára áætlun.*

Til viðbótar árlegri fjárhagsáætlun skal hreppsnefnd semja og fjalla um þriggja ára áætlun um rekstur, framkvæmdir og fjármál Biskupstungnahrepps. Þessi þriggja ára áætlun skal vera rammi um árlegar fjárhagsáætlanir hreppsins. Skal hún unnin og afgreidd af hreppsnefnd innan eins mánaðar frá afgreiðslu árlegrar fjárhagsáætlunar.

57. gr.

*Útgjöld úr sveitarsjóði.*

Fjárhagsáætlun skal vera meginregla um tekjuöflun, ráðstöfun fjármuna og fjármála- stjórn Biskupstungnahrepps á fjárhagsárinu og ekki má stofna til útgjalda eða greiða fé úr sveitarsjóði nema heimild sé til þess í fjárhagsáætlun, útgjöldin séu lögbundin, samningsbundin eða samþykkt af hreppsnefnd.

Hreppsnefnd skal árlega gæta þess svo sem kostur er að heildarútgjöld hreppsins þar með talin rekstrarútgjöld fari ekki fram úr heildartekjum hans.

58. gr.

*Skil á fjárhagsáætlun til ráðuneytisins.*

Strax að lokinni afgreiðslu hreppsnefndar skal senda félagsmálaráðuneytinu fjárhagsáætlun skv. 54. gr. og þriggja ára áætlun skv. 56. gr. Sama á við um endurskoðaða áætlun eða breytta skv. 55. gr.

59. gr.

*Afgreiðsla hreppsnefndar á ársreikningi.*

Ársreikningur Biskupstungnahrepps skal fullgerður, endurskoðaður og tilbúinn til afgreiðslu í hreppsnefnd fyrir lok aprílmánaðar.

Hreppsnefnd skal taka til umfjöllunar og afgreiðslu álit, greinargerðir og tillögur endurskoðanda og skoðunarmanna.

Hreppsnefnd skal hafa lokið fullnaðarafgreiðslu ársreikninga sveitarsjóðs og fyrirtækja/stofnana hans eigi síðar en 1. júní ár hvert. Hreppsnefndarmenn og sveitarstjóri skulu árita ársreikninginn.

Eintak af ársreikningnum skal senda félagsmálaráðuneytinu og Hagstofu Íslands fyrir 15. júní ár hvert ásamt greinargerð endurskoðanda og skoðunarmanna.

Samþykkt þessi sem hreppsnefnd Biskupstungnahrepps hefur sett samkvæmt 10. og 25. gr. sveitarstjórnarlaga nr. 45/1998 staðfestist hér með til að öðlast þegar gildi.

*Félagsmálaráðuneytinu, 29. maí 2000.*

F. h. r.

**Húnbogi Þorsteinsson.**

*Sesselja Árnadóttir.*

20. júní 2000

Nr. 443

## AUGLÝSING

### um deiliskipulag og breytingu á deiliskipulagi í Reykjavík.

*Ljósavík 46-50 og 56-60, breyttir skilmálar.*

Í samræmi við skipulags- og byggingarlög hefur borgarráð Reykjavíkur þann 18. apríl 2000 samþykkt breytingu á skipulagi lóðanna nr. 46-50 og 56-60 við Ljósavík. Á lóðunum má byggja hús í einum gólfleti, án stalla.

Skipulagsbreytingin hefur verið send Skipulagsstofnun til yfirferðar.

Breytingin öðlast þegar gildi.

*Bitruháls 1, deiliskipulag.*

Í samræmi við skipulags- og byggingarlög hefur borgarráð Reykjavíkur þann 14. mars 2000 samþykkt deiliskipulag fyrir athafnalóð við Bitruháls 1.

Skipulagið hefur verið sent Skipulagsstofnun til yfirferðar.

Deiliskipulagið öðlast þegar gildi.

*Reykjavík, 20. júní 2000.*

**Þorvaldur S. Þorvaldsson** skipulagsstjóri.

21. júní 2000

Nr. 444

## AUGLÝSING

### um breytingu á aðalskipulagi Reykjavíkur 1996-2016, Sóltún.

Samkvæmt 19. gr. skipulags- og byggingarlaga nr. 73/1997, hefur ráðherra þann 21. júní 2000 staðfest breytingu á aðalskipulagi Reykjavíkur 1996-2016 frá 18. ágúst 1997.

Svæðið sem breytingin nær til afmarkast af Sóltúni, Hátúni, Miðtúni og Nóatúni. Afmörkun útivistarsvæðis til sérstakra nota og stofnanasvæðis á vesturhluta reitsins breytist þannig að útivistarsvæði minnkar. Þá er afmarkað nýtt stofnanasvæði á reitnum austanverðum þar sem nú er útivistarsvæði til sérstakra nota.

Uppdrátturinn hefur hlotið þá meðferð sem skipulags- og byggingarlög mæla fyrir um og samþykki borgarráðs Reykjavíkur. Skipulagsstofnun hefur afgreitt erindið til staðfestingar.

*Umhverfisstofnun, 21. júní 2000.*

**Siv Friðleifsdóttir.**

*Sigríður Auður Arnadóttir.*